



Inatsisartunut ilaasortaq Storm Ludvigsen  
Inatsisartut  
/Maani

**Kalaallit Nunaani aqumiut imarsionermik ilinniarsimasut pillugit Storm Ludvigsen-imit, Inuit Ataqtigiit, § 37 naapertorlugu apeqqutit akineqarneri**

Matumuuna Inatsisartut Suleriaasianni § 37, imm. 1 naapertorlugu apeqqutitit 30. januar 2012 tiguneqarsimasut akissuteqarfigissavakka.

Makkuningga apeqquteqarputit:

1. Royal Arctic Linep (RAL A/S) umiarsuaataani kalaallit umiartortut qassit inuttatut atorneqarpat?
2. Taakkununnga naalakkat, aquttut, maskinmesterit, maskinalerisut igasullu qassiuppat?
3. Kiisalu Royal Arctic Linep umiarsuaataani tallimaasuni inuttat kalaallit qassit atorneqalersaarpat?

Royal Arctic Lines A/S aktianik ingerlatsiviummat Naalakkersuisullu ingerlatsineranut akulerunneq ajomata paasissutissanik Naalakkersuisut pigisaqanngillat.

Taamaammatt apeqqutigineqartut akineqarnissaat siunertaralugu ingerlatseqatigiiffik attavigineqarpoq. Akissutigineqartut ataani issuarneqarput.

1-imut.

Aallaavittut erseqqissassavarput kalaallit umiarsuaatileqatigiiffiutaanni najukkami sulisussat atorfinitsinneqarnissaat pingaarnersiuiinermi salliutinneqarmata.

Umiarsuaatileqatigiiffimmi aqumiut pisinnaasaat taamaallaat malillugit atorfinitsitsisoqarlunilu nalunaarsuisoqartarpoq – tassunga ilaallutik inatsisit umiarsuaatileqatigiiffiup umiarsuaataannut ilaasut naapertorlugit ilinniartitaanerup qaffasissusaa uppersaatillu atorneqarsinnaasut. Immikkut inuiaassuseqarneq sulisut allattorsimaffiini nalunaarsorneqarneq ajorpoq, tamannalu pissutigalugu apeqqut pineqartoq erseqqissumik akissuteqarfigissallugu ajornakusoortorujussuulluni.

Peqataanilli erseqqissassallugu pingaaruteqarpoq Royal Arctic Linep najukkani ilinniartitaanerup qaffassarneqarnissaata pisinnaasallu siuarsarnissaat assut pingaaruteqartutut isigimmagit, umiarsuarnilu nunaqarfimmukartartuni kalaallisut oqaaseqarnissaq pisariaqartinneqarmat, taamaammallu ilinniartitaanermut pilersaarut - pingaartumik ukiuni kingulliunerusuni umiarsuit nutaat inuttaqartinneqarnerat eqqarsaatigalugu – pingaarnermik inuttanut najugaqavissunut sammitinneqarpoq (apeqqut 3-mi aamma sulit takuneqarsinnaavoq)

13. feb 2012  
Sagsnr. 2012-061372  
Dok. Nr. 818567

Postboks 1015  
3900 Nuuk  
Tlf. (+299) 34 50 00  
Fax (+299) 32 50 02  
E-mail: govsec@nanoq.gl  
www.nanoq.gl

2-mut.

Akissut 1-imi soorlu taaneqartoq pisinnaasat uppernarsaatillu pisariaqartinneqartut, immikkut inuiaassuseqarneq pinnani, umiartortut sulisunut allattorsimaffianni nalunaarsorneqarput, taamaammallu apeqqutigineqartoq imaaliallaannaq akineqarsinnaanani.

3-mut.

Royal Arctic Line A/S-imit nalunaarutigineqarpoq sapinngisaq naapertorlugu najugaqavissunik atorfinitsitsisarnissap anguniarnissaa eqqarsaataammat. Massakkorpiaq umiarsuup qaamiuunik sumiissusersiortuinillu sulisussanik Kalaallit Nunaanni najukkani tusagassiorfiit aqqutigalugit pissarsiortoqarpoq. Sumiissusersiortunut tunngatillugu Danmarkimi imarsiortunut tusagassiorfinni aamma sulisussarsiortoqarpoq maani sumiissusersiortunik sulisussarsiortarneq ajornakusoortutut umiarsuaatileqatigiiffiup misilittagaqarfigimmagu. (Sumiissusersiortut 12-t qaamiullu 12-t missaat atorfinitsinneqartussaapput).

Tassunga aamma atatillugu erseqqissassallugu pingaaruteqarpoq umiarsuarnut sisamanut nutaanut mikinerusunut pisinnaasanut piumasaqaatit inatsisit tungaasigut arlalitsigut allaanerummata – aamma qaffasinnerummata – umiarsuarnut atorunnaartussanut arlalinnut naleqqiullugu. Tamanna pissuteqarpoq umiarsuit angissutsimikkut, oqimaassutsimikkut teknikkillu tungaatigut imarsiornermi malittarisassanut allanut ilaatinneqarmata, tassunga ilaalluni SOLAS.

Taamaaliornikkut allaffissornikkut periutsinik nutaanik aquttup akisussaaffigisassaanik arlalinnik eqqussisoqarniarpoq (ISM/SMS, ISPS aamma AMOS). Peqataanik umiarsuarni issimallutik aqutsisuusut ukiuni siullerni naammagittaalliutitut qularnaveeqqusiinernullu sulianik misilittagaqarfiusussanik suliaqartussaapput. Taamaammat Royal Arctic Linep umiarsuit atuleqqaarneranni umiarsuarni nutaani sumiissusersiortut misilittagaqarluartut massakkut umiarsuarni inuttaasut ilaannut piumasaqaataasunik tamakkuninnga piumaffigineqartunik naalagaqartinneqarnissaat toqqarsimavaa umiarsuit nutaat atuleqqaarnerat oqilisaaffiginiarlugu.

Kiisalu oqartussaasut umiarsuarnut marlunnut mikinernut nunaqarfimmukartartunut sumiissusersiortunut immikkut ittumik piumasaqaateqarniarput, taakkununngalu minnerpaamik sætteskipperitut (massakkut kystskipperitut) allagartaqarnissaat piumasaqaataassaaq. Royal Arctic Line inuttaasut najugaqavissut pisinnaasaat qaffassarniarlugit sulisoriinnarniarlugillu ilinniaqqinnissamik neqerooruteqarniarpoq, sulilu neqerooruteqartarluni.

Inussiarnersumik inuulluaqqusillunga

Kuupik Kleist